

23/10/1997

Hapus kemiskinan mutlak: Mahathir (HL)

Karim Sulaiman in London

LONDON, Rabu - Datuk Seri Dr Mahathir Mohamad mengajak masyarakat dunia menjadikan abad ke-21 sebagai kurun perjuangan untuk membebaskan manusia daripada belenggu kemiskinan mutlak.

Dalam syarahannya bertajuk 'Kedudukan dan Peranan Asia Dalam Pembentukan Komanwel Sejagat Abad Ke-21' di United World College of the Atlantic di sini semalam, Perdana Menteri mengajukan soalan paling mudah kepada kira-kira 200 hadirin terdiri daripada tokoh korporat, pendidikan, diplomat asing dan pelajar dari 60 negara: "Mengapa kita tidak berjuang menghapuskan kemiskinan?".

Dengan memetik perangkaan Program Pembangunan Bangsa-bangsa Bersatu (UNDP) yang mengesahkan Malaysia kini mencapai kemiskinan mutlak sifar berbanding separuh daripada rakyatnya berada dalam kategori itu kurang 30 tahun lalu, Dr Mahathir berkata dunia sebenarnya mempunyai cara untuk menghapuskan kemiskinan mutlak.

"Kini rakyat Malaysia memandang ke hadapan untuk memasuki abad baru ini dengan kemiskinan mutlak sifar, hampir tiada seorang pun berada di bawah garisan kemiskinan mutlak.

"UNDP berkata negara saya yang sederhana, Malaysia, adalah penghapus terbaik kemiskinan daripada muka bumi ini dalam sejarah manusia selepas perang. Jika kami boleh melakukannya, seluruh dunia tentu boleh melakukannya," kata Dr Mahathir dalam ucapan yang dibacakan oleh Menteri Pendidikan, Datuk Seri Najib Tun Razak.

Dr Mahathir dijadual menyampaikan ucapan itu sendiri tetapi tidak dapat berbuat demikian kerana menghidap selesema. Siri syarahan tahunan bagi ketua-ketua industri Britain anjuran United World College of Atlantic itu mendapat tajaan Rio Tinto, syarikat perlombongan terkenal di dunia.

Perdana Menteri berharap abad akan datang seharusnya satu kurun yang menjadikan manusia lebih penyayang bukan saja terhadap sesama manusia tetapi juga terhadap alam sekitar.

"Mereka yang percaya bahawa mencintai alam sekitar satu kemewahan yang kita tidak mampu, adalah silap. Jika kita tidak dapat melancarkan perjuangan sejagat yang diperlukan ini untuk menyelamatkan alam sekitar sedunia pada ketibaan kurun ke-21, cahaya samar abad ke-21 akan menjadi gelap. Ia akan benar-benar gelap-gelita," katanya.

Beliau kesal kerana abad ke-20 yang sepatutnya menjadi satu kurun aman yang memberi tumpuan kepada kegirangan hidup menjadi abad kematian berjuta orang.

"Adakah tidak mengaibkan bahawa terlalu besarnya harapan terhadap kurun ke-20 yang begitu ketara dirasakan 100 tahun lalu, begitu mengecewakan dan terpesong?

"Dalam abad ke-20, kita sepatutnya melakukan banyak usaha untuk menghapuskan sama sekali kemiskinan mutlak, melenyapkannya terus daripada bumi ini.

"Tetapi apa yang kita temui? Kesengsaraan teruk yang tidak pernah dilihat dunia," katanya.

Dr Mahathir bagaimanapun menegaskan, beliau tidak mengutuk beberapa ribu jutawan yang secara bersama mempunyai lebih kekayaan daripada berbilion manusia yang kebanyakan mati kebuluran atau sedang menghadapi kebuluran.

"Adalah diwajibkan dari segi politik untuk mengagumi mereka yang menguasai kekayaan besar sementara ada yang berkata, berjuta mereka yang kebuluran itu lebih baik dilupakan sahaja atau diturunkan menjadi nota

kaki sejarah.

"Tetapi saya harus akui bahawa saya lebih berasa kurang senang dan begitu sedih apabila memikirkan tiga bilion penduduk planet ini hidup bergantung pada US\$2 sehari, setiap hari dalam hidup mereka," kata Dr Mahathir.

Pada abad ini, lapan setengah juta askar dan 13 juta lelaki, kanak-kanak dan dewasa yang terkorban dalam Perang Dunia Pertama dan 19 juta askar dan orang awam yang mati dalam Perang Dunia Kedua.

Ini ditambah dengan kematian yang berpunca daripada doktrin dengan Hitler dan Nazisme menyebabkan penghapusan 17 juta orang, manakala Stalin dan komunis Russia membunuh antara 20 hingga 25 juta manusia.

Dr Mahathir berkata, Abad Asia yang diharapkan berlaku pada kurun akan datang oleh kebanyakan rakyat Asia, tidak menjadi kenyataan, sebaliknya abad ke-21 harus menjadi `abad dunia' atau Komanwel sejagat yang tidak mengecualikan sesiapa.

Umat Asia tidak harus menyimpan hasrat mewujudkan abad Asia atau membenarkan hegemonisme baru walaupun mereka percaya abad akan datang yang hanya 26 bulan lagi, harus menjadi kurun mereka atas dasar adalah giliran Asia untuk menjadi tuan.

"Kepada mereka yang percaya abad Asia akan sampai, saya minta maaf kerana memusnahkan impian mereka.

"Saya percaya idea kewujudan abad Asia hanya hasrat yang sia-sia," katanya.

(END)